



Шочмо эл, порылык да чын верч!

Будь готов!

28-ше (3572) №,
2022 ий 15 июль,
кугарня.



Ямде лий

1933 ий 1 февраль годсек лектеш.

0+



Ме марий улына!



Авторын фотожо.



Рекламе.

ПОДПИСКЕ

Пагалыме лудшына-влак,
2022 ийын кокымшо пелийжылан «Ямде лий»

газетлан возалташ вашкыза:

верласе связь отделенийште (почто);

podpiska.pochta.ru сайтыште але «Почта России» мобильный приложений гоч.

Индекс – П4696.

Марий самырык тукум слёт марий шұлышан ўдыр-рвезе-влакым ий еда иквереш уша. Тений тудо Марий Турек район Сардаялыште 8-13 июлышто эртаралтын. Тушко Марий Эл, Татарстан, Башкортостан республикла, Одо, Угарман, Виче кундемла гыч 60 наре самырык ег ушнен. Чолга ўдыр-рвезе-шамыч коклаште «Ямде лий» газетын кызытсе да ончычсо юнкоржо-шамычым ужаш куанле лийын. Тиде Марий Турек район Карлыган школын тунем-шыже-влак Лиана ден Диана Семёновамыт, У Торъял школ гыч Иван Глушков. Снимкыште тыгак Йошкар-Оласе 14-ше номеран гимназий гыч Элеонора ден Эсмеральда Александровамытым, У Торъял школ гыч Алексей Якимовым, Эвелина Речкина, Оля Ситниковам ужда. Нунат марий шұлышан улыт, түрлө марий конкурс ден мероприятийыште мастарлыкыштым ончыктат.

– Марий йылмым, марий тўвырам йоратымына, проектым возаш кумылан улмына слётыш толаш таратен. Ме марий йылмына дене кугешнена. Торашке каена гынат, шочмо йылме дене кутыраш огына вожыл, – ойлат ўдыр-рвезе-влак.

Х.АЛЕКСАНДРОВА.

«Сенымаш» модмаште



Фотом интернет гыч налме.

1-9 июльышто Моско кундем-мысе Алабино полигоньшто «Победа» всероссийский военно-спортивный модмашын финалже эртаралтын. Российын 84 регионжо гыч 14-17 ияш 1000 наре самырык ен чумырген. Ёдыр-рвезе-влак строй дене коштмаште, викториныште, «Визитка команды» конкурсышто, «Огневой рубеж» эста-

фетыште, «Дорога победителей» модмаште мастарлыкштым да вий-куатыштым тергеныт. Марий Элын чапшым Волжск олесе 9-ше номеран школын тунемшыже-влак араленыт. Юл кундем федерал округысе регионла гыч толшо команде-влак коклаште кокымшо верыш лектыныт.

Е.ИВАНОВА ямдылен.

Историйым шергалына

1410 ий 15 июльышто руш войска да тудын союзникше-влак Трюнвальдский кресталмаште немич рыцарь-влакым сененыт.

1770 ий 18 июльышто Петр Александрович Румянцевын вуйлатыме руш армий Ларге воктене кресталмаште турко-влакым кырен шалатен.

Еш отрошто

8 июльышто Советский посёлкышто «Остров семейных сокровищ» модыш программе эртаралтын. Пайрем годым түрлө алан пашам ыштен (снимкыште). Йоча-шамыч еш нерген калыкмутым, семым пален налыныт, мурым муреныт, куштеныт, селфим ыштеныт. Чыла пло-

щадкым эртен, буква-влакым погеныт. Тыгай шомакшамыч лектыныт: «йоратымаш», «пагалымаш», «ўшан», «вашумылымаш». «Счастливики» команде икымше лийын.

Настя СОЛОВЬЁВА.

3-шо номеран

Советский школ.



2 Фотом еш архив гыч налме.

Российысе увер

3-7 ияш йоча-влаклан «О» телеканал «Союзмультфильм» дене пырля «Отличное лето» сүрет конкурсым увертарен. Сүретым 25 август марте колтыман. Тўрыс уверым kanal-o.ru сайтыште ончыман.

17-36 ияш самырык ен-влакым «Наше поколение» конкурсышко ушнаш ўжыт. Шочмо йылме дене почеламутым але ойлымышым возыман да afunrf@yandex.ru адрес дене электрон почтыш 31 август марте колтыман. Сылнымут паша-шамычым сборникеш савыклат.

8-11-ше класслаште тунемше да информатикым йоратыше-влаклан программирований дене кокияш курсым онлайн эрташ йон пуалтеш. Ёдыр-рвезе-влак 4 модулян 36 шагаташ программым яра тунемаш тўнгалыт.

Марий Элысе увер

6 августышто Йошкар-Оласе Патриарший площадыште калык кочкыш фестиваль эртаралтеш. Тушто түрлө калык шке кочкышыж дене палдараш тўнгалеш. Мероприятийышке 60 тўжем наре уна толшаш.

Telegram-каналыште марий актёр, поэт Йыван Кырлалан пөлеклалтше стикерым луктыныт. Тушто марла 20 фразе уло. Мутлан, «Кугу тау!», «Салам лийже» да моло.

Козьмодемьянск олесе «Паллада» клубын юнгыж-шамыч Кострома олаште эртаралтше Самырык моряк-влакын регион-влак коклаше слётыштышт лийыныт. «Патриотическая песня» конкурсышто, 500 метрыш куржмаште да снарядым кышкышмаште икымше верыш лектыныт.

Калыкын пагалымашыжым сулен

Чебоксар олаште «Успешная семья Приволжья - 2022» конкурсын финалже эртаралтын. Юл кундем федерал округын түрлө регионжо гыч 14 еш ушнен. Еш-влак йўла, пиалан еш илышын секретше дене палдареныт, усталыкыштым ончыктеныт, шочмо кундемышт нерген каласкаленыт. Марий Элын чапшым Волжский район гыч Яранцевмыт еш **(снимкыште)** арален да «Приз зрительских симпатий» танасыште икымше верыш лектын.



Фотом еш архив гыч налме.

Тамара Анатольевна Яранцева кок шке шочшыжым да ашнаш налме ныл икшывым ончен куштен. Кызыт – эше вич йочалан ава. Яранцевмыт еш спорт

дене пенгыде кылым куча, походыш кошташ йората, «Юл сем» ансамбльын чолга участникше.

Е.СЕРГЕЕВА ямдылен.

Сенгымаш

«Школа года - 2022» всероссийский смотр-конкурсим иктешленыт. Козьмодемьянск олесе «Дарование» школ-интернат сенгышыш лектын.

Шолыштмо деч шеклане

Кенеж жапыште велосипед шуко енын транспортышкыжжо савырна. Тыгодым тошкымо оравам шолышташ шонышо-влакат ешаралтыт. Марий Эл Республикысе элгөргө паша министерствын пресс-службыжо калыкым түткырак лияш үжеш. Велосипедым йомдараш огыл манын, икмыняр ой-кагашым темла.

Түн правил – велосипед оза деч посна кодшаш огыл. Ик-кок минутлан веле ордыжыш корангыда гынат, велосипедым лўмын келыштарыме көгөн дене тўкылыман. Көгөнын тросшо күжгў да пенгыде лийшаш. Тошкымо оравам кужу жаплан кодымо годым лўмын келыштарыме сигнализацийым ешарыман. Йон улогын, видеокамер логалме верыш шогалтыман.

Велосипед рамеш але орваш ўштылалтдыме чия дене түрлө знакым сўретлыман.

Велосипедым шолыштыныт гын, **полицийыш 102** але **МВД-ш 68-00-00** телефон номерла дене йынгыртыван. Полицийыш йодмашым пуымо годым велосипедын документшым ончыктыман. Фотом (уло гын) кодыман, ойыртемалтше пале нерген ойлыман.

Насосым, понарым, велокомпьютерым да моло арверым пелен налман. Шичме верым рончен налаш лиеш гын, корангыман. Шарныза, подъезд тўкылалтеш гынат, велосипедым аралаш келшен ок тол.



Йоча-влак, шарныза: енын погыжым йодде налмаш шолыштымашлан шотлалтеш. Тидлан закон ончылно мутым кучыман: **штрафым тўлыклат але эрык деч посна кодат.**

Е.ИВАНОВА ямдылен.

Ончылно – ял пайрем

Кенеж, мый тыйым пеш вученам. Кечыгут йолташшамыч дене модаш, кутырен шинчаш лиеш. Нигушко вашкаш. Кызыт Аделина, Настя, Никита, Даниил дене пырля клубышко коштына, ял пайремлан ямдылалтына. Клуб вуйлатыше Н.М.Топорова эре порын вашлиеш. Надежда Михайловна мемнам кушташ туныкта. Августышто шке мастарлыкнам калык ончылно ончыктена.

Яна РЕПИНА.
Советский, Орша.

Изинек тунемам

Мый кенежым велосипед дене кудалышташ йоратем. Тошкымо оравам у, чапле да мотор. Лач мыланем келшыше. Велосипед – тыгаяк технике. Тудым жапыштыже мушман, ўйлыман, ачалыман. Мыят велосипедем эскерем. Кеч-мом аныклаш изинек тунемман. Тидын нерген ача-авамат эре ушештарат.

Саша ИВАНОВ.
Морко, Коркатово.





Туктым цлына

Синквейн

Марий сылнымут
 Öрыктарыше, куандарыше.
 Палдара, шоныкта, рашемда.
 Шинчымашым пойдарыше.
 Туныктышына.

Софья ЧЕМЕКОВА.
 Советский, Орша.

Кроссворд

Марий
 калыкын
 I погынжо



Шола гыч пуллашке:

3.Пашам тўналме деч ончыч пырля погыннен эртареныт. **4.**Погынын программыжым возышо коклагыч иктыже. **6.**Могай вел марий-влак чолгалык дене ойыртемалтыныт? **8.**Погын тиде тылзын эртен. **10.**Съездын делегатше, просветитель. **11.**Марла газет тиде олаште лектын.

Кўшыч ўлыкō:

1.Съездыште кагашыме йодыш. **2.**Погынын делегатше, просветитель. **5.**Погын могай олаште эртаралтын? **7.**Погыным вуйлатыше. **9.**Съездыште кагашыме йодыш.

В.СМИРНОВ ямдылен.

Палаш онгай

1917 ий 15-25 июльышто
 (28 июль-5 август у стиль дене)

Уфа губернийысе Бирск олаште марий калыкын I погынжо эртаралтын.



Лудмыжо чонеш логалеш

Морко район Коркатово лицейын тунемшыже Тая Суворова (**снимкыште**) почеламутым сылнын лудаш йората. Сценыште шкенжым устан куча: шке вийжылан ўшанымыже иканаште шижалтеш. Чолга марий ўдыр «Колумб лудмаш» регион-влак кокласе сылнымут пайремыш тений кумшо гана ушнен. В.Колумбын «Пожар» кусарыме почеламутшым лудмыжо кажне егын чонешыже логалын, очыни. Ўдырўен, образыш пурен, авторын шоньмашыжым кажне колыштшо деке намиен шуктен. Тая ты почеламут дене 11-14 ияш-влак коклаште икымше верыш лектын.

– Марий койышан улмемлан аваем ден туныктышемлан тауштем. Шочмо йылмым йораташ ешыште тунемынам гын, келгынрак шижаш туныктышем Нина Вениаминовна Аркадьева полша. Марий поэт-влак Валентин Колумбын, Сергей Чавайнын, Миклай Казако-



вын сылнымутыш утларак келшат. Нунын произведенийыштым лудын, мут шапашем пойдарем, шинчымашем ешарем. Садланак 7-8 куплетан почеламутым мый пеш писын тунемал, – оила Тая.

Е.ИВАНОВА.
 Авторын фотожо.

Книга – йолташем

Мый книгаг лудаш йоратем. Книгагудышко уло кумылын коштам. Тушто тўрлō ончер эртаралтеш, у книга дене палыме лийына. Мыланем ойлымаш ден йомак-влак поснак келшат. Книгаг лудмо почеш дневникым тунемме ий мучко вўден улына. Садлан книгаг кажне кечын лудынам. Ме школ книгагудо нерген проектым классыште араленна. Проект пашам ыштен, мый шуко ум пален налынам.

Ульяна ТАНЫГИНА.

Шернур, Кукнур.

Мо тыгай пиал?

Иктылан пиал – тиде миллион дене окса, весылан – йоратыме еш. Мыланем пиал – кас мучко сылне мурым колыштын, тамле чайым йўын, кидышке у книгаг кучен лудмаш. Иктаж-могай конкурсышто сегышыш лектамат, шкемым пиаланлан шотлем. Пиал тўрлō лийын кертеш. Тудым умылыман да шижман. Тек кажне ег пиалан лиш.

Настя ИВАНОВА.

Морко, Эгерсола.

Ака - шўжарлан пример

Ксюша ден Арина Фёдоровамыт (снимкыште) Йошкар-Оласе 2-шо номеран школышто тунемыт. Чолга ака-шўжар тўрлө конкурсышто мастарлыкыштым ончыклат, изинек мариий шўлышан, пайрем йўлам жаплыше кушкыт.

– Мый лудаиш йоратем, школышто ИКН урок келша. Мариий калыкын эртыме корныж нерген шуко оңайым пален налына. Туныктышына Татьяна Николаевна Гребнева мариий вургем, кочкыш, пайрем-влак нерген палдара. Шинчымашем пойдараиш манын, коча-кова, авай деч йодыштам, – ойла Ксюша.

Арина акаж деч примерым налеш. Марла лудаиш, почеламутым тунемаш йората, тўрлө поделкым ышта да конкурслашке ушна.

Е.СЕРГЕЕВА.

Авторын фотожо.



С.Г.Чавайнын илышыже да усталык корныж почеш

Тест

1. Серызын илыме жапше.

А) 1898-1937 ийла. Б) 1888-1934 ийла. В) 1888-1937 ийла.

2. Икымше музыкальный пьесыже.

А) «Акпатыр». Б) «Мўкшотар». В) «Автономий».

3. «Пеледыш жап» почеламутшо могай ийыште возалтын!

А) 1918 ий. Б) 1919 ий. В) 1920 ий.

4. «Ото» почеламутым возымо ий.

А) 1905 ий. Б) 1909 ий. В) 1915 ий.

Дарья АРХИПОВА.

Морко, Энерсола.

Урем мончашке пура

*Плїтыра вошт шарлен.
Урем гочат нимо раш ок кой.
Дима окнашке ончале да тунамак уло кертмын кычкырал колтыш:*

– Ончал-ончал, ачай!
Уремна мончашке пура.

Я.ЕГОРОВ.

Акростих

Сотнур йоратыме школна

Ончысо гаяк сорап.

Теве туныктышына

Нелылыкым чактара.

Уш-акылым пойдара,

Рашемда, умылтара.

Шочмо элым аралаш,

Кылым пенгыдын кучаш,

Осал койышым сенаш,

Лым лийде пашам ышташ.

**«Русская словесность»
кружокын енге-влак.**

Волжский, Сотнур.

Чон сем

Кенеж. Кас. Ах, йўр,
ит озалане –
Чыланат малат, тўня мала.
Чон семем, сита,
изиш шыплане.
Муралташ? Кўлеш?
А кō пала...

Иканаште шўлыкян,
куанле –
Умылен ом керт молан
йоршеш?
Пыл кокла гыч тылзыже
ончале,
Пуйто тудо шыпак
шыргыжеш.

Трукышто ошеме
да волгалте,
Пыл-влак шылыч,
куржыч нуно куш?
Чоныштемже куан сем
йонгалте,
Да тыгодым йомо пуйто уш.

Аня ПРОХОРОВА.

1-ше номеран

Шернур школ.

*Уло чон дене тыршет гын,
шоньмашкет садак шуат.*

М.ИЛИБАЕВА.

Кидпалан пōлек

Коркатово лицейыште тунемше ўдыр-влак (снимкыште) Йошкар-Олаште

эртаралтше Пеледыш пайремыште лийынна. Тушто «Йомак чондай» йоча сълнымут форумышко ушненна. Йоча писатель Елена Юнусова, серызе Анатолий Тулай, «Кече-Солнышко» журналын тўн редакторжо Светлана Архипова дене вашлийын мутланенна. Елена Андреяновна мыланем шке книгажым кидпалыжым пыштен пōлеклен.

Полина АЛЕКСЕЕВА.

Морко район.

Фотом еш архив гыч налме.





Еш дене лудына

Мемнан ялна чодыра воктене верланен. Пётр кочам кажне ийын кенезым чодырасе изи олыкышто шудым сола. Телылан кургым шапашла: ковам дене шорыкым ашнат. Мыят кочамлан полшаш коштам. Пётр кочай шонгемын, кеч-могай сомылым эркын, вашкыде ышта. Чўчкыдын каналташ шинчеш. Тыгодым мыланем тўрлў огайым каласкала. Кочай кукшо шудо копнам олыкышто шуко жап ок шинчыкте, орваж дене мўнгў шупшыкта. Орваже кугу огыл, шудат шуко ок пуро.

Икана мыят полшаш мийышым. Орва дене шудым суртыш кондышнат, пўртыш каналташ пурышна. Изиш лиймеке, шудым ястараш лекна. Ончена, орва воктене пырысиге коштеш. Ала-мом ўпшычеш, орва йыр пўрдеш. Кочай пырысигым поктен колтынеже, а тудыжо коран каяш огешат шоно. Мый пырысигым кидышкем налаш лишемым, а тудо шудышко тўршталтыш.

– Йўра, айда коштшо, – ойла кочам, – шудым шаньык дене эплын ястарена. Пырысигым шеклане.

Шаньык дене ик-кок ора шудым налмеке, кўргыштў ала-мо койылалтыш. Лишкырак лийын ончална гын, шудо кўргыштў рывыжигым шекланышна. Тудо лўдын пытен, туртын. Кочай кепкыж дене рывыжигым лупшале да

Чодыра уна

Ойлымаш



кидышкыже нале. Янлыкиге шып гына шинча, огешат тўрштыл. Кочай рывыжигым мыланем кучыктыш.

– Тиде изи падырашын мемнан деке унала толмыжо шуын, ужат, – ойла кочам. – Векат, олыкышто

шудым ямдылымемым эскерен илен. Чумыртен шындыме копна ўмбалне модынат, мален колтен гын веле. Ынде аваже йомдареныс тиде падырашым. Кычалеш дыр... Рывыжигын кочмыжат шуэш, очыни.

Мыят рывыжигым чаманышым, шинчавўдемат лекте. Вет але пеш изи, шкаланже кочкышымат муын ок керт.

– Кочай, айда рывыжигым мўнгыжў наўгаен кодена. Тудо аваж деч посна иленжат ок керт. Аважым кычалаш тўўгалеш, – шонымем ойлем кочайлан.

– Уныкам, могай порочонан улат, – вuem шыман ниялтыш кочай. – Осал йоча четлыкыш петыра ыле. Теве тый аваж деке наўгаяш кутырет. Айда, изиэтым иктаж-мо дене пўтыралын кучо. Мучышта гын, кучен от керт, йомеш. Погыно веле, олыкыш каена.

Ме рывыжигым шудо погымо олыкыш намиен кыдышна. Тушто аваже кычал муэш, шонена. Тулыкеш кодшо игылан илаш моткоч йўсў. Янлыкигат, кайыкигат, йочат ава-ача пелен кушшаш улыт.

Люда АКМУЛЛИНА.

Башкортостан,

Караидель, Ыткўстў.

Сўретым интернет гыч налме.

Пасу тўрыштў илыше Кужывоч коля, йўр йўрмым ончыде, волгыжмеке, вигак кынеле. Молгунамсе семын, чылдырий турий дене пырля муралташ манын, тўжваке куржын ыш лек. Йўрын выр-выр-выр йўкышым колыштын, окна деке лишеме. Чаршам коранден, пўртўсын вўдыштў йўштылмыжым икмагал эскерыш. Пеледышан шудо коклаште, чарныде, мардеж куржталыштеш. Тудо, лышташлам рўзалтен, вўд пырчым ўлыкў шыжыктен йоктара.

Кужывоч, пасу покшелне илыше кокаж деке каяш шонымыжым ващталтен, эр кочкышым ямдылаш пиже. Тудо аныклен кодымо таршўрашым

Кужывоч

Йомак

лукто. Конга тулым ылыжтен, келге салмашке шўрым оптале. Шўр шолаш пурышат, озавате мушмо таршўрашым да шинчалым чывыштен пыштыш. Колян пучымышым пудыратен шогылтмо жапыште омсам тўкалтыме йўк шоктыш. Озавате вурт лийын кайыш. Йўра эше Кужывоч йўдлан омсажым тўкў дене чараклен! Уке гын тыгай ночкышто кошташ йўратыше чонанет, нимом шотыш налде, пўртышкў кроп пуренат шогал кертеш! Кужывоч, тўрлым шонкален, «Кў туш-



то?» манын йодо. Кокажын йўкышым колмеке, келгын шўлалтен, омсам почо. Кужу сурмыжерым чийыше кокаже, омсалондемемым вончыде, йўр авыртышыжым почкалтен, Кужывоч ўмбаке вўд пырчылам шыжыктен, пыльге шыргыжале. Озавате ны саламлалтмет, ны мочет, кочкышым шолтымыжым шарналтен, конга деке содор куржын, пучымышым пудыраташ пиже. Кока ярагида толын огыл, шўрашан мелнам конден.

Уремыште шургышо йўр йўкым колыштын, Кужывоч ден кокаже, ўстелтўрышкў лакеммеке, пучымышым кочкыч, мелнам авызылышт.

С.ГРИГОРЬЕВА-СОТО.

МЧС шижтара

Шокшо игече шогы-мылан көра чодыраште тўткө лийза.



Регина ГРИГОРЬЕВАН
сўретше.

Волжский, Пётъял.

Ару йыран чоным куандара

Пакчаштына кок теплице деч посна эше 26 йыраныште кушшо түрлө пакчасаска мемнам куандара. Рок йымаке нөшмым уралтен веле, саска ок шоч. Поян лектышым налаш, ой, мыняр тыршыман! Мландым пушкыдемдыман, шўкшудым күрман, вўдым шавыман – кенеж мучкылан паша сита. Ик кечын ешна дене 26 йыраннам шўкшудо деч эрыктышна. Пакча волгалт кайыш. Кочам тыге ойла: «Кө мландым шымата, тудым мланде чамана, поян саскам пөлекла». Кызыт мыйын тыгай паша: шўкшудо лекме почешак кажне йырангым эрыкташ (снимкыште). Йыранет ару – саскат тўвыргө, чонет куаныше.



Фотом
еш архив
гыч налме.

Даша СОШИНА.

Морко, Купсола.



Маша ден Тланы Шем теңызыште канат.

- Вўдшө шинчалан аман, – ойла Тланы.
- Вучалте, сакырложашым кондем.

Маша ик пакет сакырложашым конда да вўдыш опталеш.

- Садак шинчалан.
- Тлйже лугалтыде тамлен ончышычыс.

20 июль – Шахматын
тўнямбал кечыже.

Сўретым чиялтыза.



Южым йўкшыктарена

Шокшо игече годым шукунжо, очыни, вентиляторым кучылтыт. Кече пелтыме годым меат тудын дене пайдаланена. Но южгунам вентилятор шокшо южым йўкшыктарен огеш керт. Тыгай годым мыланна «Ямде

лий» газетыште савыктыме пайдале ой-кагаш полша. Ме пластик атеш вўдым кылмыктена да вентилятор ончык шындена. Тыманмеш юалге мардеж пуалеш.

Аня ВИНОГорова.

Звенигово, Кожласола.

➔ Российыште XVI курымышто кияр нерген икымше гана пален налыныт.

➔ Ик килограмм киярыште – улыжат 150 калорий.

➔ Киярыште 95 процентше – вўд.

Палаш онгай



Июльын кумшо шуматкечынже Суздальыште кияр фестиваль-пайрем эртаралтеш. Ты кечын тушко Российын түрлө кундемже гыч агроном-влак погынат. Нуно пакчасаскам ончен куштымышт, опытышт нерген палдарат

да ончыктат. Фестивальыште жаритлыме, күктымө киярым, кияр когылым, вареным да моло түрлө кочкышым тамлен ончаш лиеш. Пайремын тўн ужашыже – кияр парад. Фестиваль кияр-курчакым каваш колтымо дене мучашлалтеш.



«Ямде лий» газет
Тўн редактор
Л.Н.ГРИГОРЬЕВА.
Индекс: П4696.
Тираж 1550 экз. Заказ
Формат – А-4-8.

https://vk.com/yamde_lii
<https://ok.ru/yamdelii>
E-mail: yamde_lii@mari-el.ru
(документ кагазлан),
yamde_lii@mail.ru
(автор-влаклан)
Сайтын адресше: yamdelii.ru

УЧРЕДИТЕЛЬ-ВЛАК: Мари́й Эл Республикысе культу́р, печать да калык-влакын пашашт шотышто министерстве, «Кугарня» газет» кугыжаныш унитарный казна предприятий.

Газетым редакцийыште погымо да верстатлыме, «Мари́й Эл Республикысе Правительствын типографийже» ООО-што ямде оригинал-макет гыч савыктыме. Типографийын адресше: 424000, Йошкар-Ола, Комсомольский урем, 112.

Газетым Кыл, информационный технологий да массовый коммуникаций сферым эскериме шотышто федеральный службын Юл кундем федеральный округысо управленийыштыже регистрироватлыме.
Номер – ПИ № ТУ52-01335,
2021 ий 29 сентябрьыште пуымо.

0+

Печатьыш пуымо жап –
14-00,
фактически – 13-00

Авторын да редакцийын шонымышт түрлө лийын кертят. Серыш-влак мөнгеш огыт колталт.
Ак – кутырен келшыме почеш.

Редакцийын да издательнын адресше:
424006, Йошкар-Ола, СССР Вооружённый Вийын 70-ше идалыкше урем, 20-шо порт.
Тел. 8(8362) 45-22-82(факс)

Йўлам арале –
тўвырам
пойдаре

Шар-влакым түрлө чия
дене чиялтыза. Тўс-шамыч
марла кузе йонгат!
Каласыза.



Конкурс

Ксения МУСОВА.
Звенигово, Поянсола.




Аня ЧЕРТИЦЕВА.
Йошкар-Ола.

Тушто

Пеледыш йыр
чонештылеш.
Шымала.
Шинчеш.
Пашалан
тазан пижеш.

Тиде шул-
дыран тулаче
шке пашажлан
пешак паче:
Кечыгут
чонешты-
леш – эр
тўналын кас
лиймеш.



Мўкшиге-влаклан пеледышышт
деке корным ончыктыза.

Йонгылыш-
влакым
муза да
тўрлатыза.



- 8 + 2 = 9
- 7 - 7 = 1
- 5 + 0 = 0
- 10 - 7 = 3
- 4 + 5 = 10
- 7 + 0 = 8
- 9 - 4 = 5
- 8 + 1 = 7
- 6 - 6 = 2
- 8 - 0 = 8



10 ойртемем кычалза.



Пырля сўретлена




Сылне роза

Шошым авам дене пакчашке
розам шындышна. Кызыт
тудо пеледалтын. Роза йошкар
тўсан. Торашке волгалтеш. Пеш
сўралын коеш. Кажне гана, пак-
чашке лекмеке, тудын моторлык-
шым ончен йывыртом. Чевер кечан
игече годым пеледышыш мўкшат,
пачемышат, ошымшўлышат чо-
нештен толыт. Нунат, куанен,
йырже пўрдыт. Изи пеледыш илыш
вийым пуа, кумылым нўлта.

Ангелина ВАСИЛЬЕВА.

Морко, Коркатово.

Интернетесе сўрет-влакым кучылтмо.



Лыве-влакын ўмылыштым муза.

Кажне радамаште могай
фигур уто да молан!